

SAN MO' FESTA 'D LE FRÒLE

Le fròle a San Mò, a son na tradission,
tramandà dai vej, e, scritta 'nt la stòria!
Ma òrmai, a son pòchi ch'a vanto la glòria
ëd mandene avanti la coltivassion!!

Na vòlta la “Festa”, a l'era pròpi sentìa,
dosse le fròle, bele le frolere!
Tuti a corijo a le bele manere,
al soris, a l'invit ëd na bela fija!

Adess, chi a vend, a l'é vej e rancin,
setà daré un banch con ël soris sdentà.
A vendo le fròle coma gran rarità,
butà ant'j platò al pòst dij sestin!

L'unica còsa ch'a ciama la gent,
a son le rusade ch'a pianto 'nt la via.
- “Vardé la mia fròla!” - “a l'è pì bela la mia!” -
E la Festa as duverta, crijand d'assident!!

As capiss, che d'antlora,... che évolussion!
Ij frolon al pòst ëd le frolin-e,
ij vej 'l post ëd le totin-e,...
ma, ch'as pèrda mai la tradission!!